

## Adamu Anarudi Nyumbani Tena!

*Kwa kuwa kama katika Adamu wote wanakufa, kadhalika na katika Kristo wote watahuishwa. Lakini kila mmoja mahali pake; limbuko ni Kristo; baadaye walio wake Kristo, atakapokuja. 1 Wakorintho 15:22, 23.*

**K**atikati ya kulewalewa kwa nchi, kuangaza kwa umeme na ngurumo ya Kradi, sauti ya Mwana wa Mungu inawaita watakatifu waliolala ... Wafu wataisikia sauti hiyo na hao watakaoisikia wataishi. Dunia nzima itavuma kwa mshindo wa miguu ya jeshi kubwa kupita kiasi kwa kila taifa, kabila, lugha na jamaa ...

Wote wanatoka makaburini mwao wakiwa na kimo kile kile kama walivyolingia kaburini. Adamu, anayesimama kati ya umati uliofufuka, ana kimo kirefu na umbo la kifahari, kimo chake kikiwa kidogo tu chini ya kimo cha Mwana wa Mungu. Anatoa tofauti kubwa kwa watu wa vizazi vya baadaye; katika suala hili moja inaoneshwa kuporomoka sana kwa jamii. Lakini wote wanainuka wakiwa na upya na nguvu za ujana wa milele...

Mawaa yote na ulemavu vimeachwa kaburini. Wakiwa wamerejeshwa katika mti ule wa uzima katika Edeni iliyopotea kwa muda mrefu, waliokombolewa "watakua" hadi kufikia kimo kamili cha jamii katika utukufu wake wa kwanza...

Pale waliokombolewa wanapokaribishwa kwenye Mji wa Mungu, kunavuma sauti ya shangwe ya kuabudu angani. Adamu wale wawili wanakaribia kukutana. Mwana wa Mungu anasimama na mikono iliyonyoshwa kumpokea baba wa jamii yetu—kiumbe ambaye Alimuumba, ambaye alitenda dhambi dhidi ya Muumbaji wake na ambaye kwa ajili ya dhambi yake alama za kusulubiwa zimebebwa juu ya umbo la Mwokozi. Pale Adamu anapozitambua alama za misumari katili, haanguki kifuani mwa Bwana wake, bali kwa unyenyekevu anajiweka chini ya miguu Yake, akipaza sauti: "Astahili, astahili Mwana-Kondoo aliyechinjwa!" Kwa upole Mwokozi anamwinua na kumwamuru aangalie tena nyumba ya Edeni ambayo alikuwa amefukuzwa kwa muda mrefu...

Huku kuunganika tena kunashuhudiwa na malaika wale waliolia wakati wa anguko la Adamu na kufurahi wakati Yesu, baada ya ufufuo Wake, alipopaa kwenda mbinguni, akiwa amefungua kaburi kwa wote watakaoamini katika jina Lake. Sasa wanaona kazi ya ukombozi ikiwa imetimizwa nao wanaunganisha sauti zao katika wimbo wa sifa.